

Die alte Götter

Text: Adrian Klapproth
Melodie: Adrian Klapproth und Beni Mosele

Refrain

Die alte Götter s'gid sie nümm
Die alte Götter sind verbi
Au wenn's mänge ned vertreid
Sie hend uf gäh, hend verseid

1.

Was wott de Jupiter de Alt
Wo Blitz grüehrt hed mit Donnergwalt
I dere Wält mit siner Chraft?
Jedi Rakete hed meh Saft
Sini Macht isch ustrickst worde
Vo Männer mit und ohni Orde
Sid eine d'Bombe hed erfunde
Isch de Jupiter veschwunde

Was söll de Neptun no im Meer
Gäg U-Boot mit sim Dreizackspeer
Oel, Abfäll, und Bombetescht
Gänd Pflanze, Vögel, Fisch de Rescht
Sini Fründ, Delphin und Wal
Nämed täglich ab a Zahl
Hüt isch der alti Meeresgot
Vergrabe under Gift und Schrott

Refrain

Die alte Götter s'gid sie nümm
Die alte Götter sind verbi
Au wenn's mänge ned vertreid
Sie hend uf gäh, hend verseid

2.

D'Venus, die Schön, mit ihrer Kunscht
In Sache Liebi, Sex und Brunnscht
Sie hed mängs Kuppelstückli gwogt
Doch ihri Dienscht sind nümme gfrog
Was wär no, was sie biete cha
Wo me ned für Gäld cha ha
Me seid sie seig us Schum gebore
Im Schlamm heig me sie z'lescht verlore

De Bachus, alte Gott vom Wii
Mit siner Rusch-Philosophie
Hed mängem schöni Stunde gwürzt
Und Mänge is Verdärbe gstürzt
Alkohol als Troscht-Ersatz
Macht hüt härt're Droge Platz
Sid eme Trip mit LSD
Heig me de Bachus nie meh gseh

Refrain

Die alte Götter s'gid sie nümm
Die alte Götter sind verbi
Au wenn's mäenge ned vertreid
Sie hend uf gäh, hend verseid

3.

D'Juno, Kämpferin für d'Frau
Macht me Tag für Tag zur Sau
Merkur de Götterbote chlönt
Er wird vo de Medie übertönt
De Naturschutz vo Apoll und Juno
Verdhebed nümme, trotz UNO
Sogar der alti Chriegsgott Mars
Isch mit de Weisheit hüt am A.....

Refrain

Die alte Götter s'gid sie nümm
Die alte Götter sind verbi
Au wenn's mänge ned vertreid
Sie hend uf gäh, hend verseid

Vielleicht sind's eifach z'mönschlich worde
Z'alt und z'blöd und z'stur
Vielleicht hend all, wo Macht missbruched
E letschti Stund uf ihrer Uhr

Die alte Götter s'gid sie nümm
Die alte Götter sind verbi
Wer sich zum Gott ufspiele wott
Isch hüfig zletscht meh Mönsch als Gott

Adrian Klapproth
Auf CD „Bis zu mim letschte Schnuf“